



DEN NORSKE KYRKJA

Hareid sokn

Ope brev

Ref.FR 31/25

Høyringsutkast «Forskrift om lokale gravplassvedtekter for Hareid kommune, Møre og Romsdal»

Det blir etter vedtak i fellesrådsmøte 11.11.25 i sak 31/25 sendt ut til høyring framlegg til nye lokale gravplassvedtekter for Hareid kommune. Vedtektene er ei samla oppdatering frå dagens gravplassvedtekter som vart godkjent i 2000.

Framlegget blir sendt ut på høyring med høyringsfrist 2.februar 2026.

Tysdag 27.januar kl 1830-2000 blir det arrangert høyringsmøte på kyrkjelydshuset med høve til drøfting og avklaringar av høyringsframlegget.

Endeleg framlegg til forskrift for gravplassvedtekter for Hareid kommune blir sendt Statsforvaltaren i Vestfold og Telemark for godkjenning, etter ordinært fellesrådsmøte 10.mars 2026.

Framlegg til Forskrift om lokale gravplassvedtekter, Hareid kommune, Møre og Romsdal

(Høyringsutkast godkjent i møte i Hareid kyrkjelege fellesråd 11.11.2025.)

Vedtatt av Hareid sokneråd xx.03.2026 med heimel i lov av 7. juni 1996 nr. 32 om gravplassar, kremasjon og gravferd (gravplasslova) § 21 første avsnitt, § 8 første avsnitt og § 14 første avsnitt og forskrift til lov om gravplassar, kremasjon og gravferd av 10. januar 1997 nr. 16 (gravplassforskrifta) § 15a fjerde avsnitt.

Godkjent av Statsforvaltaren i Vestfold og Telemark (dato), jamfør lov av 7. juni 1996 nr. 32 om gravplasser, kremasjon og gravferd (gravplasslova) § 21 første avsnitt

§ 1 Forvaltning



Gravplassane i Hareid kommune er underlagt Hareid sokneråd.

§ 2. Definisjonar

Gravplassmyndigheit: Hareid sokneråd.

Festa grav: Grav som det er inngått eller fornya festeavtale for.

Festa gravstad: Fleire kistegraver som er festa saman.

Ordinær urnegrav: Grav til oskeurne med plass til fire urner.

Urnegrav i minnelund: Grav til oskeurne i minnelund med plass til éi urne.

Kistegrav: Grav som følgjer gravplassforskrifta sine krav til storleik for gravlegging av kister. I ei kistegrav kan ein òg gravleggje oskeurner.

Fredingstid: Tidsrom frå siste gravlegging til ein kan nytte grava igjen til ny gravlegging.

Festetid: Tida som det er avtalt å feste ei grav.

Gravansvarleg: Den som er ansvarleg for ei tilvist grav.

Festar: Den som står som part i ei festeavtale.

Anonym minnelund: Gravfelt for anonyme graver. Feltet kan ha eit felles minnesmerke utan opplysningar om kven som er gravlagt.

Namna minnelund: Gravfelt med felles minnesmerke med namn og data på dei som er gravlagde der.

§ 3. Ferdsel på gravplassane

Besøkande skal om mogeleg ferdast gåande, jf. gravplassforskrifta § 9 andre avsnitt. Gravplassmyndigheita kan etter søknad gi løyve til å køyre ved dokumentert sjukdom/forflyttingshemming. All køyring skal skje særleg omsynsfullt.

§ 4. Gravplasstillhøyrse

Avdøde personar i kommunen skal gravleggjast på den gravplassen dei soknar til.

Dei har rett til fri grav dersom gravplassmyndigheita har tilvist grava. Retten til utvida frigravperiode er nærmare regulert i gravplassforskrifta § 16 første avsnitt og gravplassforskrifta § 18 andre avsnitt. Avdøde personar som på grunn av sjukdom eller alderdom har budd i ein annan kommune mot slutten av livet, blir rekna med på same måte som kommunen sine eigne innbyggjarar, og har rett til fri grav dersom gravplassmyndigheita har tilvist grava.

Avdøde personar frå andre kommunar kan bli gravlagt i kommunen mot at ein betaler kostnadane ved gravferda og avgift som ved feste av grav.

§ 5. Fredingstid

Fredingstida er 20 år.



Gravfelta E, G, H har fredingstid på 70 år for kistegraver

Felt M er freda kulturminneområde.

Gravolassmyndigheita kan vedta lengre fredningstid for enkelte graver.

§ 6. Stenging for kistegravlegging

Følgande gravfelt er stengt for kistegravlegging: Felt E, G, H.

Felt M er stengt for gjenbruk som freda kulturminneområde.

§ 7. Feste av grav med meir

Når ei kistegrav skal takast i bruk, er det høve til å feste ei grav ved sida av ho, og etter søknad til gravplassmyndigheita; for ei ekstra grav i tillegg når behovet seier det. Desse festa gravene utgjer då éin gravstad.

Ved bruk av ei ordinær urnegrav, kan ein ikkje feste ei grav ved sida av.

Ved feste av ei grav ved sida av den kistegrava som ein først nyttar, er festetida 20 år.

Når festetida/fredingstida er ute, kan ein feste grava/gravstaden for inntil 50 år. Når det er gått 50 år etter siste gravlegging, kan festet ikkje bli fornya utan etter eit særleg samtykkje frå gravplassmyndigheita. I god tid før festetida er ute, skal forvaltninga varsle festaren..

Har ein ikkje fornya festet innan seks månader etter forfall, går grava eller gravstaden tilbake til gravplassen.

Innbetalt festeavgift blir berre betalt tilbake dersom tilbakebetaling følgjer av bindande rettsreglar eller det ligg føre særlege grunnar.

Ein kan ikkje gravlegge i ei grav utan samtykke frå gravansvarleg eller festar. Dersom det ikkje er råd å hente inn samtykkje frå gravansvarleg eller festar, kan gravplassmyndigheita avgjere gravlegginga.

Festar pliktar å melde adresseendring.

§ 8. Grav og gravminne

Ved opning av ei grav kan ein legge jorda på dei omkringliggande gravene og ein kan mellombels flytte gravutstyret. Gravplassmyndigheita sørgjer for istandsetting igjen, og vil også sjå til at grava blir planert og tilsådd med gras etter gravlegging. Montering av gravminne kan først skje etter at gravplassmyndigheita har godkjent gravminnet og merka staden der det skal stå. Det kan ikkje bli sett opp tidlegare enn 6 månader etter gravlegging av kiste. Gravminne på urnegrav kan ein sette opp med ein gong etter urnenedsettinga. Så lenge ein ventar på



gravminne, ordnar gravplassmyndigheita eit merke med namnet til avdøde.

På ein nyfesta gravstad skal gravminnet plasserast i bakkant av den grava ein først nyttar. Gravminnet blir ståande der sjølv om ein tar i bruk fleire graver.

Gravminne som vert sett opp utan å vere godkjent og som ikkje er i samsvar med regelverket, kan etter gitt frist bli fjerna av gravplassmyndigheita.

§ 9. Plantefelt

Fram for gravminnet er det høve til å opparbeide eit plantefelt i høgde med bakken omkring. Det må ikkje vere breiare enn gravminnet si breidde, men kan i alle tilfelle vere opp til 60 cm breitt. Det kan ikkje stikke lengre fram enn 60 cm, målt frå gravminnet sin bakkant. Det kan ikkje plantast vekstar som går over høgda til gravminnet eller går ut over plantefeltet.

I plantefeltet er det høve til å setta ned dekorgjenstandar og sorguttrykk, så lenge dei ikkje er til sjenanse, gjer drifta av gravplassen vanskeleg (opning av grav, grasklipping, o.l.), eller er brannfarleg i samband med tenning av lys, jamfør neste avsnitt.

Det er høve til å tenne lys (stearinlys, oljelampe ol.) når dette er innanfor dei gjeldande føresegnene om brannvern. Lykter og lys må vere tilstrekkeleg festa, til dømes med jordspyd, eller ha ei eigenvekt som gjer at dei ikkje kjem på avveggar.

Ein skal fjerne lys og andre lause dekorgjenstandar etter bruk.

Det er høve til å ramme inn plantefeltet med ein delt steinkant eller ei bedplate som fluktar med terrenget omkring. Bedplate og fundament for gravminne skal ikkje henge saman.

Dersom det ikkje er aktuelt å ha plantefelt, skal det vere grasbakke på alle sider av gravminnet.

Det er ikkje høve til å ramme inn grava med hekk eller andre materiale.

§ 10. Plantemateriale

Planter, kransar og liknande materiale som ein har nytta ved gravferd eller ved pynting av grava og som endar som avfall, skal vere heilt kompostérbare.



§ 11. Stell av grav

Kvar gravansvarleg eller festar har rett og plikt til å stelle den grava vedkomande har ansvaret for. Plantefelt som ikkje blir tilplanta eller stelt, skal den gravansvarlege eller festaren så til med gras, eller blir tilsådd av gravplassmyndigheita.

Den gravansvarlege eller festaren pliktar å halde gravminnet sikra og i forsvarleg stand.

Gravansvarlege eller festaren kan avtale med gravplassmyndigheita, eller den som får løyve til det etter § 13, om planting og stell av grav, samt montering, sikring og vedlikehald av gravminnet. Ei slik avtale frittek ikkje den gravansvarlege eller festaren frå det ansvaret vedkomande har etter dei til ein kvar tid gjeldande føresegnene.

§ 12. Namna minnelund

Vi tilbyr ikkje namna minnelund pr i dag. Dette er under planlegging.

§ 13. Næringsverksemd

Næringsdrivande som ønskjer å drive verksemd på gravplassen, skal hente inn løyve frå gravplassmyndigheita. Løyvet kan kallast tilbake dersom vedkomande ikkje rettar seg etter dei reglane som gjeld. Slik verksemd kan berre omfatte montering, sikring og vedlikehald av gravminne, samt planting og stell av graver, og avtala arbeid/oppdrag på eller i tilknytning til driftsbygning og Hareid kyrkje.

§ 14. Arbeid på gravplassane

Anleggs- og vedlikehaldsarbeid skal skje på kvardagar i arbeidstida (kl. 07:00-17:00) og må ikkje utførast på søndagar, heilagdagane eller offentlege høgtidsdagane. Ikkje noko arbeid på gravplassen må vere til sjenanse for seremoniar eller rituelle handlingar på gravplassen eller i ein bygning på gravplassen. Næringsdrivande kan berre køyre på gravplassen i den grad det er naudsynt for å gjere arbeidet. Slik køyring skal skje ekstra omsynsfullt.

§ 15. Dispensasjon frå vedtektene

Gravplassmyndigheita kan i særlege tilhøve og innanfor ramma av gravplassloven og gjeldande forskrifter fråvike §6 i vedtektene.

§ 16. Ikraftsetjing og oppheving av eldre vedtekter

Forskrifta tar til å gjelde 30 dagar frå kunngjering i Norsk Lovtidend. Frå den same tida blir [vedtektene vedtekne av Hareid sokneråd den 15. juni 2000 under sak 35/00, og den 22. august under sak 45/00, og](#)



DEN NORSKE KYRKJA

Hareid sokn

[godkjenning av Møre bispedømeråd den 1. august 2000, for gravplassane i Hareid kommune.](#) Møre og Romsdal, oppheva.

Hareid 18.12.2025

Med helsing

Jostein Bildøy
kyrkjeverje
Hareid sokn